

直隸叙永廳志卷二十五

武功志

直隸叙永廳

明 何福 洪武二十一年討平永寧畢節都勻

諸蠻邊境大定

程 信 安徽休寧縣進士景泰七年任參政遷

兵部尚書成化中與襄城伯李瑾督兵征大壩

都夷至永寧分三道會於大壩南寧伯毛寧亦

至敗賊於李子關師還晉兼大理卿

直隸叙永廳志 卷五

武功

王重光 有傳 見藝文

朱燮元 浙江山陰縣人萬歷二十年進士任四

川右布政使天啟元年藺曾奢崇明同子寅叛

巡撫徐可求等遇害賊據重慶僭偽號設偽丞

相五府等官統所部及徼外諸蠻數萬衆分道

趨成都作呂公車曳以牛俯瞰城中燮元用巨

木爲機關轉索發礮飛千鈞石擊之又以大礮

擊牛牛返走敗去會賊將羅乾象等欲反正燮

元呼飲戍樓中與同臥乾象誓死報乃遣部將

詐降誘崇明至城下伏兵起崇明免脫與寅遁走瀘州乾象遂以衆來歸城圍百二日而解尋獲僞丞相何若海進攻永寧擊敗奢寅於土地坎追至老軍營涼傘舖盡焚其營崇明父子逃入紅巖大囤官軍蹙而拔之連拔天台白巖楠木諸囤賊奔入舊蘭州城爲羅乾象所攻克崇明父子率餘衆走水西糾合安邦彥據險以守邦彥謀分犯雲南遵義而令寅專犯永寧未行寅淫凶甚有阿引者受變元金錢乘寅醉殺之

直隸叙永廳志

卷五

武功

二

寅旣死邦彥自稱四裔大長老號崇明大梁王合兵十餘萬犯赤水變元授計於許成名等引賊至永寧邦彥恃勇擬先拒永寧軍急索戰總兵侯良柱副使劉可訓遇賊十萬於五峰山桃紅壩大破之賊奔又追敗之紅土川邦彥崇明皆授首藺土悉平變元進少師世蔭錦衣指揮使

曾省吾 巡撫四川克平九絲都蠻有大功德於民

鄭梁棟 初任畢節分巡兵備道水西夷叛棟率
畢節指揮等入永寧同許成名等破賊桃紅壩
劉可訓 舉人天啟間任叙馬瀘兵備道爲總兵
侯良柱監軍副使進剿水藺奏桃紅壩之捷可
訓力居多上褒嘉之陞右副都御史巡撫順天
尋陞薊遼總制

張 論 河南光州進士天啟間巡按四川藺曾
之變同撫軍守成都崇正三年陞副都御史巡
撫剿奢崇明安邦彥大破酋醜蜀人賴之

直隸叙永廳志

卷五

武功

三

國朝嚴自明 陝西人永寧駐鎮順治間奢保壽據鎮
雄叛自明平之

楊應魁 滿洲人康熙元年分巡永寧道值鎮兵
進剿江安土寇吳天民永城空虛賊驟至勢甚
危急應魁徵調鄉勇指揮得宜擒斬賊兵無數
招集流移人皆安堵